

Uunga siunnersuut: Siusinaartumik pensionisiat pillugit Inatsisartut inatsisaata allannngortinneqarneranik Inatsisartut inatsisaat nr. xx, xx. xxx 2019-imeersoq

(Kalaallit Nunaanni, Danmarkimi Savalimmiunilu kommunit akornanni paasissutissanik paarlaasseqatigiittarneq, nuunnermi siusinaartumik pensionisianik qaammatini 12-ini attassiinnarnissaq, ingerlaannartumik qaffasinnerpaanik siusinaartumik pensionisianik pisartagaqalersitsineq)

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Saqqummiussissut

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Siullermeerneqarnera

Taamatut siunnersuuteqarnikkut naalagaaffeqatigiinnermi siusinaartumik pensionisialinnut nuuttunut naalagaaffeqatigiinni killeqarfiit ajornartorsiutaajunnaarsinneqarnissaat inatsisitigullu inissisimanerisa pitsanngorsaavigineqarnissaat siunertarineqarpoq. Siunnersuutikkut kalaallit siusinaartumik pensionisiallit Danmarkimi Savalimmiuniluunniit kommunimut nuunnermikkut pilersorneqarnissamut tunngavigisaat isumannaarneqassapput.

Siusinaartumik pensionisiat pillugit Kalaallit Nunaanni, Danmarkimi Savalimmiunilu tamarmik immikkut inatsiseqarput. Aallaavittut nunanut naalagaaffeqatigisanut allamut nuunnermi siusinaartumik pensionisiat ingerlatiinnarneqarsinnaanngillat. Taamaattumik siusinaartumik pensionisiallit naalagaaffeqatigiit akornanni nuuttut, naalagaaffeqatigisami allami nuuffigisami siusinaartumik pensionisiaqarnissamut nutaamik qinnuteqaateqartassapput. Akuttunngitsumik naalagaaffeqatigisami allami nuuffigisami suliap sularineqarnera sivisusinnaavoq, qulakkeerneqarsinnaanngilarlu siusinaartumik pensionisiaqartoq naalagaaffeqatigisami allami nuuffigisamini siusinaartumik pensionisianik pisartagaqalissasoq.

Ilaatigut ajornartorsiutinik tamakkuninnga pissuteqartumik decembari 2018-imi danskit suliffissaqartitsinnermut ministeriat aamma Savalimmiut isumaginninnermut ministeriat ataatsimeeqatigineqarput. Siusinaartumik pensionisialinnut killeqarfiit aporfuijunnaarnissannut sulissuteqartoqassasoq ataatsimiinnermi isumaqatigiissutigineqarpoq. Tamanna suliniutinik pingasunik nunat immikkut tamarmik siusinaartumik pensionisiat pillugit inatsisaanni piviusunngortinneqartussanik isumaqatigiissuteqarnermik kinguneqarpoq, taakkulu ataatsikkut atuutilersinneqartussanngorput.

Suliniutit taakku tassaapput;

1. Naalagaaffeqatigiinni kommunit akornanni paasissutissanik paarlaasseqatigiittarnerit.
2. Ikaarsaariarnermi aqqissuussineq, tassani siusinaartumik pensionisiaqartoq naalagaaffeqatigiit iluani allamut nuunnermini siusinaartumik pensionisiani allamik pilersornissamut tunngavissaqalernissami tungaanut ingerlatiinnarsinnaavai – sivisunerpaamilli qaammatini 12-ni.
3. Siusinaartumik pensionisiaqartut sulisinnaassuseqanngitsut imaluunniit annikitsuinnarmik sulisinnaassuseqartut, Danmarkimi siusinaartumik pensionisiaqalernissamut imaluunniit Kalaallit Nunaanni Savalimmiuniluunniit qaffasinnerpaamik siusinaartumik pensionisianik pisartagallit, naalagaaffimmi immikkoortortamut nuuffigisaminnut ingerlaannartumik siusinaartumik pensionisianik pisartagaqalissasut.

Suliniutit pingasut taakku tunngavigalugit siunnersuut aalajangersakkanik kalaallit siusinaartumik pensionisiallit Danmarkimut Savalimmiunullu nuukkaangamik inatsisitigut inissisimanerannut pitsaanerulersitsisunik imaqarpoq.

Siunnersuutikkut siunertaavoq Kalaallit Nunaanni kommunip qimanneqartup aamma Danmarkimi Savalimmiunilu kommunip nuuffigineqartup akornanni paasissutissanik paarlaasseqatigiittarnikkut suliat suliarineqartarnerisa sukkanerulersinnissaat. Tamakku saniatigut siunnersuut kalaallinut siusinaartumik pensionisialinnut nuuttunut pitsaanagerusumik aningaasaqarnikkut isumannaallisitsissaaq, tassami Kalaallit Nunaanni siusinaartumik pensionisiat appasinnerpaat akunnattullu Danmarkimi aamma Savalimmiuni qaammatit 12-it tikillugit ingerlatiinnarneqarsinnaalissammata.

Danmarkimit aamma Savalimmiunit siusinaartumik pensionisiallit sulisinnaassuseqanngitsut imaluunniit annikitsuinnarmik sulisinnaassusillit Kalaallit Nunaanni sulisinnaassutsiminnik nalilersuiffigineqaqqaarnatik ingerlaannartumik qaffasinnerpaanik siusinaartumik pensionisianik pisartagaqalissapput. Taamatorpiaq kalaallit siusinaartumik pensionisiallit Kalaallit Nunaanni qaffasinnerpaamik siusinaartumik pensionisiaqartinneqartut Danmarkimut imaluunniit Savalimmiunut nuukkunik ingerlaannartumik danskisut savalimmiormiutulluunniit siusinaartumik pensionisiaqalissapput.

Danmark Savalimmiullu siusinaartumik pensionisiat pillugit inatsisiminni aalajangersakkanik taamaattunik atuutilersitsissapput, taamaalilluni siusinaartumik pensionisiallit naalagaaffeqatigiinni nuuttut naligiissinneqalissammata. Taamaammat siunnersuutikkut tassuuna naalagaaffeqatigiinnermi killeqarfinnik pissuteqartumik ajornartitaasut peerneqassapput, naalagaaffeqatigiinnilu siusinaartumik pensionisiallit inatsisitigut inissisimanerat pitsanngortinneqarluni.

Taamatut oqaaseqarlutik Naalakkersuisut oqaluuserisassaq Inatsisartunut akuersaallaqqullugu oqaluuserisassanngortippaat.